

Na osnovu člana 22. i 24. stav 1. Zakona o Vladi Kantona Sarajevo ("Službene novine Kantona Sarajevo", broj 24/03 - Prečišćeni tekst), člana 5. stav (4) Zakona o policijskim službenicima Kantona Sarajevo ("Službene novine Kantona Sarajevo", broj 25/06) i člana 33. st. 2. i 5. Zakona o unutrašnjim poslovima Kantona Sarajevo ("Službene novine Kantona Sarajevo", br. 22/00 - Prečišćeni tekst, 15/02, 18/02 i 28/02), Vlada Kantona Sarajevo, na 29. sjednici održanoj 25. septembra 2007. godine, donijela je

## **UREDBU**

### **O POLICIJSKOJ ZNAČKI I SLUŽBENOJ ISKAZNICI POLICIJSKIH SLUŽBENIKA MINISTARSTVA UNUTRAŠNJIH POSLOVA KANTONA SARAJEVO**

#### **Član 1. (Pojam)**

Ovom Uredbom propisuje se izgledi policijske i funkcionalne značke, izgled otiska policijske značke, obrazac i sadržaj obrasca službene iskaznice (u daljnjem tekstu: iskaznica), koju nose policijski službenici Ministarstva unutrašnjih poslova Kantona Sarajevo (u daljnjem tekstu: Ministarstvo), postupak izdavanja policijske značke i iskaznice, rok važenja, zamjenu i vođenje evidencije o policijskoj znački i iskaznici i upotreba otiska policijske značke.

#### **Član 2. (Ravnopravnost spolova)**

Gramatička terminologija u ovoj Uredbi podrazumijeva uključivanje oba spola.

#### **Član 3. (Izdavanje)**

- (1) Policijska značka i iskaznica izdaju se policijskim službenicima Ministarstva.
- (2) Iskaznica je javna isprava.
- (3) Funkcionalna značka izdaje se ministru unutrašnjih poslova (u daljnjem tekstu: ministar), sekretaru Ministarstva i direktoru Uprave za administraciju i podršku.

#### **Član 4. (Izgled policijske značke)**

- (1) Policijska značka izrađuje se livenjem od legure, zaštićena je hromiranjem (zlatno i srebrno) i bojenjem.
- (2) Policijska značka je u obliku stilizovanog štita, reljefne izrade, dimenzija 78 mm dužine i 62 mm širine u svom najdužem i najširem dijelu.
- (3) Centralni dio značke čini krug boje policijske uniforme (grao-siva, kataloški broj 5810), u središtu koga se nalazi simbol: munja i vaga (munja je vertikalna osnova vage, što simbolizira brzinu i promptno djelovanje policije, a vaga njenu pravičnost i nepristrasnost).
- (4) Simboli su urađeni reljefno, uvijek u zlatnoj boji.
- (5) Oko centralnog kruga sa simbolom je stilizovan vijenac sa po tri lista sa svake strane. Na lijevoj strani vijenca urezuje se ime organizacione jedinice nosioca značke, a na desnoj njegova funkcionalna oznaka. Urezani natpisi su iste boje kao i centralni krug.

- (6) Iznad centralnog kruga je traka sa natpisom "POLICIJA" za pripadnike uniformisane policije, odnosno dvoredno postavljen natpis "KRIMINALISTIČKA POLICIJA" za pripadnike kriminalističke policije.
- (7) Iznad ovog natpisa je traka iste boje kao i centralni krug, na kojoj je natpis "KANTON SARAJEVO".
- (8) Natpis je bijele boje.
- (9) Policijska značka se pravi u tri vrste izvedbe prema stručnoj spremi i činu koji su predviđeni za određeno radno mjesto i to:
  - a) zlato visoka stručna sprema
  - b) zlato/srebro viša stručna sprema
  - c) srebro srednja stručna sprema
- (10) Izvedba u zlatu se očituje u tome što je cijela policijska značka žuto hromirana.
- (11) Izvedba u kombinaciji zlato/srebro, očituje se u tome da su bijelo hromirani dijelovi vijenaca na kojima su ugravirana imena organizacione jedinice i funkcionalna oznaka, kao i po tri lista vijenca sa svake strane, dok je ostatak značke žuto hromiran.
- (12) Izvedba u srebru se očituje u tome da je cijela policijska značka, izuzev po tri lista vijenca sa svake strane i simboli koji su žuti, hromirani bijelim.
- (13) Na poledini značke utisnut je serijski broj značke, s tim da se za svaku organizacionu jedinicu utiskuju serijski brojevi od 01 (organizacione jedinice vezane za sjedište), odnosno 001 (za policijsku upravu) do onog broja sa koliko policijskih značaka je organizaciona jedinica zadužena.

Član 5.  
**(Izgled funkcionalne značke)**

- (1) Funkcionalna značka je zlatno hromirana, bez gravure na vijencu, iznad značke nalazi se poseban dodatak - pločica vezana uz značku, na kojoj je natpis "MINISTAR", "SEKRETAR", odnosno "DIREKTOR UPRAVE".
- (2) Značke iz stava (1) ovog člana izdaje ministar.

Član 6.  
**(Otisak policijske značke)**

- (1) Otisak policijske značke je u obliku stilizovanog štita.
- (2) Centralni dio značke čini krug boje policijske uniforme (grao-siva, kataloški broj 5810), u središtu koga se nalazi simbol: munja i vaga (munja je vertikalna osnova vage, što simbolizira brzinu i promptno djelovanje policije, a vaga njenu pravičnost i nepristrasnost).
- (3) Simboli su urađeni u zlatnoj boji. Oko centralnog kruga sa simbolom je stilizovan vijenac sa po tri lista sa svake strane, iznad centralnog kruga je traka "POLICIJA", a iznad ovog natpisa je traka iste boje kao i centralni krug na kojoj je natpis "KANTONA SARAJEVO" koji je bijele boje.
- (4) Otisak policijske značke se može koristiti:

- a) na natpisima u službenim prostorijama dimenzija 360 x 300 mm, na zgradama dimenzija 1700 x 1260 mm i na službenim vozilima Ministarstva dimenzija 470 x 370 mm;
- b) na memorandumima, zvaničnim pozivnicama, čestitkama i sličnim aktima Ministarstva u standardnim veličinama za tu vrstu akata.

Član 7.

**(Posebni oblici policijske značke)**

Policijska značka koju nosi policijski komesar je zlatno hromirana, na vijencu nema nikakve gravure, iznad značke nalazi se poseban dodatak - pločica vezana uz značku, na kojoj je natpis "POLICIJSKI KOMESAR".

Član 8.

**(Značka poginulog i preminulog pripadnika Ministarstva)**

Policijska značka koja je pripadala poginulom i preminulom pripadniku Ministarstva i koja se predaje porodici tog pripadnika, u svom gornjem dijelu, ispod natpisa "POLICIJA" ima pričvršćenu pločicu zlatne boje u kojoj je urezano "ZA SJEĆANJE", odnosno "U SPOMEN".

Član 9.

**(Značka umirovljenika/penzionera Ministarstva)**

Policijska značka koju zadržava pripadnik Ministarstva koji odlazi u mirovinu/penziju, u svom gornjem dijelu, ispod natpisa "POLICIJA" odnosno "KRIMINALISTIČKA POLICIJA" ima pričvršćenu pločicu zlatne boje u koju je urezan natpis "PENZIONER", odnosno "UMIROVLJENIK".

Član 10.

**(Postupak sa značkom po isteku mandata)**

Po isteku mandata policijskog komesara, isti zadržava svoju značku, s tim da se u lijevu stranu vijenca urezuje riječ "POČASNA", a u desnu stranu vijenca "ZNAČKA".

Član 11.

**(Tekst iskaznice)**

Tekst iskaznice ispisan je latinicom i ćirilicom i to na bosanskom, hrvatskom i srpskom jeziku, a tekst ovlaštenja ispisan je latinicom i ćirilicom i to na bosanskom, hrvatskom i srpskom jeziku, kao i na engleskom jeziku.

Član 12.

**(Izgled iskaznice)**

- (1) Iskaznica je izrađena od tvrdog plastificiranog papira, dimenzija 87 x 56 mm i dvostrana je.
- (2) Prednja strana sadrži:
  - a) u gornjem desnom uglu grb Kantona Sarajevo,
  - b) u gornjem lijevom uglu policijska značka,
  - c) ispod ovog elementa fotografija nosioca iskaznice dimenzija 28 x 24 mm, preko koje se utiskuje suhi žig Ministarstva,

- d) ispod fotografije se upisuje broj policijske iskaznice,
- e) u gornjem dijelu gornje trećine strane je centriran dvoredni natpis "BOSNA I HERCEGOVINA", "FEDERACIJA BOSNE I HERCEGOVINE", "KANTON SARAJEVO", "MINISTARSTVO UNUTRAŠNJIH/UNUTARNJIH POSLOVA",
- f) ispod ovog elementa je natpis "SLUŽBENA ISKAZNICA"
- g) ispod ovog elementa upisuje se ime i prezime, kao i jedinstveni matični broj imaoa iskaznice,
- h) ispod ovog elementa lijevo se upisuje datum izdavanja iskaznice,
- i) u donjem desnom uglu je potpis lica ovlaštenog za izdavanje iskaznice,
- j) na prednjoj strani iskaznice, u pozadini slova su simboli munje i vage u zlatnoj boji.

(3) Na poleđini iskaznice, jedan ispod drugog pisati tekst:

**OVLAŠĆENJE: IMALAC OVE ISKAZNICE OVLAŠĆEN JE, POD USLOVIMA UTVRĐENIM ZAKONOM: DA LEGITIMIŠE GRAĐANINA, DA GA ZADRŽI I PRIVEDE NADLEŽNOM ORGANU, DA UĐE U TUĐI STAN I DRUGE PROSTORIJE, DA SE ZADRŽI U NJIMA I DA IZVRŠI PRETRESANJE, DA NOSI VATRENO ORUŽJE I DA GA UPOTRIJEBI, DA PRIVREMENO ODUZME PREDMETE KOJI MOGU POSLUŽITI KAO DOKAZ U KRIVIČNOM POSTUPKU, DA SE POSLUŽI TUĐIM SAOBRAĆAJNIM SREDSTVIMA I SREDSTVOM VEZE, TE PREDUZME DRUGE MJERE UTVRĐENE ZAKONOM.**

**OVLAST: NOSITELJ OVE ISKAZNICE IMA OVLAST DA POD UVJETIMA PROPISANIM ZAKONOM: UTVRDI IDENTITET, ZADRŽI I PRIVEDE OSOBU NADLEŽNOM TIJELU, UĆI U TUĐI DOM I DRUGE PROSTORIJE I OBAVITI PRETRAGU, NOSI I UPORABI VATRENO ORUŽJE, PRIVREMENO ODUZME PREDMETE KOJI MOGU POSLUŽITI KAO DOKAZ U KAZNENOM POSTUPKU, POSLUŽI SE TUĐIM PROMETNIM SREDSTVOM I SREDSTVOM VEZE, TE OBAVI OSTALE POSLOVE PREDVIĐENE ZAKONOM.**

**OVLAŠĆENJE: IMALAC OVE LEGITIMACIJE IMA OVLAŠĆENJE, DA POD USLOVIMA PROPISANIM ZAKONOM: UTVRDI IDENTITET, ZADRŽI I PRIVEDE LICE NADLEŽNOM ORGANU, DA UĐE U TUĐI STAN I DRUGE PROSTORIJE, DA SE ZADRŽI U NJIMA I DA IZVRŠI PRETRES, DA NOSI I UPOTRIJEBI VATRENO ORUŽJE, PRIVREMENO ODUZME PREDMETE KOJI MOGU POSLUŽITI KAO DOKAZ U KRIVIČNOM POSTUPKU, DA SE POSLUŽI TUĐIM SAOBRAĆAJNIM SREDSTVIMA I SREDSTVIMA VEZE, TE PREDUZME DRUGE MJERE PROPISANE ZAKONOM.**

### Član 13. (Kožni povež)

- (1) Policijski službenici Ministarstva policijsku značku i iskaznicu nose u kožnom povezu.
- (2) Kožni povež je trodijelni, kada je sklopljen pravougaonog je oblika, dimenzija 120 x 80 mm, crne boje. Potpuno otvoren, povež ima oblik slova "L".
- (3) Policijski službenici pripadnici Sektora uniformisane policije Ministarstva, policijsku značku nose na lijevoj strani gornjeg dijela uniforme, na mjestu predviđenom za policijsku značku.
- (4) Policijski službenici pripadnici Sektora kriminalističke policije Ministarstva, odnosno policijski službenici koji određene poslove i zadatke obavljaju u civilu, službenu značku mogu nositi istaknutu na lijevom džepu gornjeg dijela garderobe, na kaišu pantalona odnosno na specijalnom lancu oko vrata.

Član 14.  
**(Postupak izdavanja)**

- (1) Policijsku značku i iskaznicu policijskom službeniku izdaje policijski komesar.
- (2) Značku i iskaznicu, iz stava (1) ovog člana, policijskom komesaru izdaje ministar.

Član 15.  
**(Važenje)**

Policijska značka i iskaznica vrijede od dana izdavanja do dana prestanka vršenja službe, izuzev znački iz čl. 7. do 10. ove Uredbe.

Član 16.  
**(Slučajevi preinake značke)**

- (1) Porodici poginulog ili preminulog pripadnika Ministarstva predaje se policijska značka koju je pripadnik nosio, s tim da su na istoj načinjene preinake opisane u članu 8. ove Uredbe.
- (2) Iskaznica poginulog ili preminulog pripadnika se ne predaje porodici uz policijsku značku, već ostaje u Ministarstvu.

Član 17.  
**(Evidencije)**

- (1) O izdatim policijskim značkama i iskaznicama vodi se evidencija.
- (2) Evidencija iz stava (1) ovog člana sadrži: evidencijski broj značke, registarski broj iskaznice, broj značke, ime i prezime, kao i jedinstveni matični broj nosioca policijske značke i iskaznice, naziv organizacione jedinice nosioca, poslovi i zadaci koje nosilac obavlja, datum izdavanja i rubriku za datum kada su značka i iskaznica vraćene, rubriku za datum oglašavanja nevažećom, uništenom ili povučenom iz upotrebe, rubriku za potpis lica koje vraća i rubriku za napomene koje se odnose na to da li je značka vraćena ili je zadržana i po kom osnovu.
- (3) Ministarstvo vodi Registar o izgubljenim, uništenim ili iz upotrebe povučenim policijskim značkama i iskaznicama.

Član 18.  
**(Vođenje evidencija)**

Centralna evidencija iz člana 16. ove Uredbe vodi se u Ministarstvu, dok su sve organizacione jedinice van sjedišta dužne, po istom principu, voditi vlastitu evidenciju.

Član 19.  
**(Gubitak policijske značke ili iskaznice)**

- (1) Kad policijski službenik policijsku značku ili iskaznicu izgubi ili na drugi način ostane bez istih, dužan je o tome odmah, a najkasnije u roku od tri (3) dana od gubljenja ili nestanka obavijestiti neposrednog rukovodioca i podnijeti pismenu izjavu o vremenu i načinu gubitka ili nestanka policijske značke ili iskaznice.
- (2) Nova iskaznica izdat će se nakon što se izgubljena ili na drugi način nestala iskaznica oglasi nevažećom u "Službenim novinama Kantona Sarajevo".

(3) Policijski službenik koji je izgubio policijsku značku ili iskaznicu snosi troškove nabavke nove policijske značke ili iskaznice, izuzev u slučajevima kada se iste izgube prilikom obavljanja službenih poslova i zadataka, o čemu odlučuje neposredni rukovodilac u roku od sedam (7) dana od podnošenja izvještaja o vremenu i načinu gubitka.

#### Član 20.

##### **(Vraćanje policijske značke i iskaznice)**

(1) Nosilac policijske značke kome prestane dužnost ili radni odnos u Ministarstvu ili koji bude raspoređen na radno mjesto za koje se ne izdaje policijska značka i iskaznica, dužan je da iste preda neposrednom rukovodiocu, u njegovom odsustvu rukovodiocu organizacione jedinice u čijem sastavu je organizaciona jedinica u kojoj je radio, a ako ista nema u svom sastavu drugih, manjih organizacionih jedinica, iste predaje uz upoznavanje policijskog komesara, rukovodiocu organizacione jedinice Ministarstva u čiji djelokrug spada izdavanje policijske značke i iskaznice.

(2) Neposredni rukovodilac iz stava (1) ovog člana dužan je primljenu policijsku značku i iskaznicu dostaviti nadležnoj organizacionoj jedinici Ministarstva u roku od pet (5) dana od prijema policijske značke i iskaznice.

#### Član 21.

##### **(Policijske značke i iskaznice izdate po ranijem propisu)**

Policijske značke i iskaznice izdate po ranijem propisu će se koristiti do konačne reforme policije.

#### Član 22.

##### **(Uništavanje oštećenih i razduženih policijskih znački i iskaznica)**

Oštećene ili na drugi način razdužene policijske značke i iskaznice uništiti će komisija koju imenuje ministar.

#### Član 23.

##### **(Prilozi)**

Oblik i izgled policijske značke i iskaznice, kao i izgled kožnog poveza odštampani su kao prilog ove Uredbe i čine njen sastavni dio.

#### Član 24.

##### **(Ovlaštenje za izradu)**

U postupku davanja ovlaštenja za izradu policijske značke, obrasca iskaznice i kožnog poveza primjenjuju se odgovarajuće odredbe Zakona o javnim nabavkama Bosne i Hercegovine ("Službeni glasnik BiH", broj 49/04, 19/05, 52/02, 92/05, 94/05, 8/06, 24/06, 70/06).

#### Član 25.

##### **(Prestanak važenja ranijeg propisa)**

Stupanjem na snagu ove Odluke prestaje da važi Pravilnik o policijskoj znački i službenoj legitimaciji ovlaštenih službenih lica Ministarstva unutrašnjih poslova Kantona Sarajevo ("Službene novine Kantona Sarajevo", broj 11/98 i 11/00).

#### Član 26.

##### **(Stupanje na snagu)**

Ova Uredba stupa na snagu narednog dana od dana objavljivanja u "Službenim novinama Kantona Sarajevo".

---

Broj 02-05-24214-4/07  
25. septembra 2007. godine  
Sarajevo

---

Premijer  
**Samir Silajdžić**, s. r.